

Botháin Phoiblí Fóin

Ceist 1: Beidh tú ag féachaint ar ball ar thuairisc faoi bhotháin phoiblí fóin in Éirinn.

Cé mhéad den eolas ar éirigh leat a thuiscint bunaithe ar na pictiúir?

Ceist 2: Seo stór focal a bhí le cloisteáil sa tuairisc. Ag obair leis an duine in aice leat, ceangail na focail ar chlé leis na focail ar dheis.

- | | |
|----------------------------------|--------------------------------|
| 1) Botháin | a) Shows |
| 2) Taighde | b) Foreigners |
| 3) Léiríonn | c) Research |
| 4) Coimisiún Eorpach | d) Image |
| 5) Comhlachtaí Teileachumarsáide | e) Era |
| 6) Modh Cumarsáide | f) European Commission |
| 7) Ré | g) International Calls |
| 8) Eachtrannaigh | h) Method of Communication |
| 9) Glaonna Idirnáisiúnta | i) Booths/kiosks |
| 10) íomhá | j) Telecommunication Companies |

Ceist 3: Féach ar an tuairisc don dara huair. An bhfuil na habairtí thíos fíor nó bréagach?

1. Léiríonn an taighde go bhfuair an ceathrú cuid de phobal na tíre seo réidh le fón an tí?
Fíor/Bréagach
2. Tá 20% againn ag brath ar fhóin phóca amháin le glaonna a dhéanamh
Fíor/Bréagach
3. Eircom agus Perlico an dá chomhlacht atá ag plé leis an tseirbhís seo.
Fíor/Bréagach
4. De réir mar atá líon na n-eachtrannach ag titim sa tír agus úsáid fóin phóca ag méadú, tá úsáid na mboscaí fóin ag titim go mór.
Fíor/Bréagach
5. Bhí 1,500 bosca fóin ag Smart Telecom ar fud na tíre ach fuair said réidh le míle acu.
Fíor/Bréagach
6. Bhain breis is 200,000 duine úsáid as na fóin phoiblí thar thréimhse an tsamhraidh sa bhliain 2005.
Fíor/Bréagach

Ceist 4: *“leis an tseirbhís”*

Cén ghné den ghramadach atá i gceist leis seo?

Bain triail as na samplaí seo

- 1) Chonaic mé bruscar ar an (sráid)
- 2) An raibh tú ag caint leis an (sagart)?

Ceist 5: Le dul siar ar an méid atá déanta agat, déan iarracht na bearnaí a líonadh leis na focail idir lúibíní

Is _____ Smart Telecom agus Eircom an dá chomhlacht atá ag plé leis an _____ seo. Ach tháinig méadú áirithe ar líon na ndaoine a bhain úsáid as boscaí fóin sa bhliain 2005. Bhí sé níos saoire ag eachtrannaigh glaonna idirnáisiúnta a dhéanamh as boscaí _____ ag úsáid _____ idirnáisiúnta nó glaoch a dhéanamh ar fhón póca. Bhain breis is 200,000 duine úsáid astu thar thréimhse na _____ sa bhliain 2005. Ach de réir mar atá líon na n-eachtrannach ag titim sa tír agus úsáid fóin phóca ag méadú, tá úsáid na _____ fóin ag titim go mór.

(iad, Nollag, fóin, mboscaí, cártaí, tseirbhís)

Ceist 6: Pléigh na ceisteanna seo leis an duine in aice leat nó le do ghrúpa
Tá an fón póca in úsáid ag formhór na ndaoine anois. An bhfuil cloiste agat faoi Skype?
Céard iad na buntáistí a bhaineann le Skype nach bhfuil ag an bhfón póca?

Freagraí

- Ceist 1:** Is féidir an plé seo a dhéanamh i mbeirteanna nó i ngrúpaí.
- Ceist 2:** 1-i
2-c
3-a
4-f
5-j
6-h
7-e
8-b
9-g
10-d
- Ceist 3:** Bréagach
Fíor
Bréagach
Fíor
Bréagach
Bréagach
- Ceist 4** Le réamhfhocal agus an t-alt ag teacht i ndiaidh a chéile cuirtear t roimh ainmfhocal baininsneach a thosaíonn ar s + guta, sl, sn, sr. Ní thagann aon athrú ar ainmfhocal firinsneach.
- Ar an tsráid
Ag an sagart
- Ceist 5** Is **iad** Smart Telecom agus Eircom an dá chomhlacht atá ag plé leis an **tseirbhís** seo. Ach tháinig méadú áirithe ar líon na ndaoine a bhain úsáid as boscaí fóin sa bhliain 2005. Bhí sé níos saoire ag eachtrannaigh glaonna idirnáisiúnta a dhéanamh as boscaí **fóin** ag úsáid **cartaí** idirnáisiúnta nó glaoch a dhéanamh ar fhón póca. Bhain breis is 200,000 duine úsáid astu thar thréimhse na **Nollag** sa bhliain 2005. Ach de réir mar atá líon na n-eachtrannach ag titim sa tír agus úsáid fóin phóca ag méadú, tá úsáid na **mboscaí** fóin ag titim go mór.
- Ceist 6** Fón idirlín is ea an Skype ar bhealach. Is féidir leis an mbeirt atá ag glaoch ar a chéile, a chéile a fheiceáil. Tá sé saor in aisce ó ríomhaire go ríomhaire. Is féidir glaoch ar fhóin phóca agus ar fhón tí ar chostas atá níos ísle ná gnáthrátaí.

Botháin Phoiblí Fóin

Is beag duine na laethanta seo a bhaineann úsáid as botháin phoiblí fóin agus léiríonn taighde go bhfuair an cúigiú cuid de phobal na tíre seo réidh le fón an tí. Léiríonn taighde a rinne an Coimisiúin Eorpach go bhfuil formhór na ndaoine ag baint úsáide as an bhfón póca anois agus dá bharr, go bhfuil comhlachtaí teileachumarsáide ag cur botháin phoiblí fóin ó mhaith. Tá an scéal seo uile ag Irene Ní Nualláin.

Irene Ní Nualláin

Tá 5.2 milliún fón póca in úsáid sa tír agus tá níos mó fón* phóca sa tír anois ná daoine. Níl muid ag brath ar fhóin* tí nó ar bhotháin phoiblí fóin le glaonna** a dhéanamh anois. De réir suirbhé ón gCoimisiúin Eorpach, tá fón tí ag 99% de na daoine a ceistíodh agus tá an dá mhodh cumarsáide seo, líne tí nó an fón póca ar fáil ag beagnach 70% den tír. Tá 20% againn ag brath ar fhóin phóca*** amháin le glaonna** a dhéanamh. Níor bhain ach an cúigiú cuid de na daoine úsáid as boscaí fóin le bliain anuas.

Is iad Smart Telecom agus Eircom an dá chomhlacht atá ag plé leis an tseirbhís seo. Ach tháinig méadú áirithe ar líon na ndaoine a bhain úsáid as boscaí fóin sa bhliain 2005. Bhí sé níos saoire ag eachtrannaigh glaonna** idirnáisiúnta a dhéanamh as boscaí fóin ag úsáid cártaí idirnáisiúnta nó glaoch a dhéanamh ar fhón póca. Bhain breis is 200,000 duine úsáid astu thar thréimhse na Nollag sa bhliain**** 2005. Ach de réir mar atá líon na n-eachtrannach ag titim sa tír agus úsáid fóin* phóca ag méadú, tá úsáid na mboscaí fóin ag titim go mór.

Tá beagnach 5,000 acu ag Eircom. Fuair siad réidh le 350 boscaí fóin sa bhliain 2007 de bharr easpa úsáide. De réir suirbhé a rinne siad faoin ábhar seo i mbliana dúirt 80% de na daoine a ceistíodh nár bhain siad úsáid as boscaí fóin le bliain anuas. Maidir le Smart Telecom, bhí 2,500 boscaí fóin acu in ionaid phoiblí ar fud na tíre, ach fuair siad réidh le míle acu sin le déanaí de bharr easpa úsáide. Deir Smart Telecom go gcuirfí deireadh leis na boscaí teileafóin seo faoi cheann cúpla bliain agus gur íomhá ó ré atá caite a bheidh sna boscaí fóin seo sna blianta amach romhainn.

Irene Ní Nualláin, Nuacht TG4. Gaillimh

*fónanna a deirtear

**glaochanna a deirtear.

***fón pócaí a deirtear

****sa mbliain a deirtear